



池北偶談

九

15
36
9



門 曾 20
號 36
卷 9

門 5
號 36
卷 9

池北偶談卷二十目錄

談異七之 凡四十六則

博羅韓氏女 章格菴

道君畫鷹 道州祠堂

劉雲山 趵突泉異

陳玉筍 錦裙宋繡

六足龜 羅漢

丙丁龜鑑 白鳥

奇姓 古銅器

地震定數 梨花漁人

麟 慶忌

池北偶談卷二十目

書庫

楊李

記前生

萬維嶽

丁貞女

魏舍人妾

莫如

義羸

龍睛

追寫真

善謔

前定

工人善琴

盧昭容

義虎

客氏刺

驕

來陽伯

啖石

周府馴虎

楊世榮

金墓

劉張二仙

鳩食麥

蠟蠅硯

荊州鏡筩

吳道子水陸畫

兩中式

魚舅魚爺

卷二十目畢

池北偶談卷二十

談異

濟南王士禎阮亭著——高都姪廷掄簡菴較

博羅韓氏女

明末廣州亂後有周生者市得一袴丹靛鮮好置牀側衣桁上夜分將寢忽一好女子舉幃驚問之曰妾非人也生懼趨出比曉鄰里聞之競來偵視聞有人聲自袴中出若近若遠久之形漸見姿首綽約若在輕塵曰妾博羅韓氏女也城陷被賊俘擄橫見凌逼罵賊而死此袴平生所著故附之以來諸公倘見憐愍爲作佛事當往生淨土永脫輪迴言訖嗚咽衆其歎異乃爲召僧禮佛焚袴自是遂絕程職方石臞說

章格菴

黃州曹石霞昌崇禎己卯解元癸未進士以文章名世父卒官順寧旅櫬未返萬里入滇順寧有民家生一兒七歲不言一日忽語父曰楚人曹石霞吾門生也今日至此當往見之家人疑怪不信兒輒自往父母尾之至通衢果有肩輿來者兒從稠人中直前止其輿呼之曰石霞吾待汝久矣曹愕然兒又曰此地未可語當至邸舍告汝既至邸兒又曰可屏人闔戶如其言兒南向坐曰我章格菴正宸也一念之誤三墮輪廻始在豫繼在粵在此候汝又數年矣今可隨我去乎曹歎訝再拜曰某以父櫬未返葬問關萬里遠涉南荒未能即從夫子請俟異日兒默然久之曰然則吾先行待汝耳

遂至其家是夕死矣曹賦詩紀異不數月竟卒於順寧其子以櫬歸至某郡忽重不可舉視其壁上乃有曹入滇時弔洪半石天詩洪亦黃人藁葬於此乃啓洪竈禱於櫬前請同歸葬於是遂行楊職方鄂州兆說

道君畫鷹

楊職方又言武昌張氏有子婦爲狐所媚百計驅之不獲一日置酒召客張宣和御筆畫鷹於堂上比客去狐夜分始至云幾不免婦問之狐曰汝家堂上有神鷹見我即奮欲搏擊微項有鐵絙將不免矣質明狐去婦以語其夫或謂之曰畫誠神物曷爇去其絙狐必不敢復至矣如其言至夕果有狐擊死堂下後其家遭回祿共見鷹從火中飛去

道州祠堂

道州有濂溪先生祠堂近歲周氏子孫有爲諸生道賦者州守張大成遼東人徑詣祠堂枷鎖先生像三日見諸彈章比年吳中奏銷逋稅唐荆川繆西谿諸公名列官戶亦不免云

劉雲山

劉雲山常州醫也康熙丙午杭州有巨室子某病亟忽有一醫到門曰我吳人劉雲山也投一七而霍然贈之金不受曰他日尋我於毘陵之司徒廟巷踰月某至常詢問廟側有老人曰雲山死二十七年矣顧雲山生時信鬼神曾授夢於斯廟之神募地廣其祠宇因自爲像於神旁尚可識其形容也巨室子驚愕入拜其像宛然哭祭而去陳椒峯_玉基記其事

趵突泉異

濟南趵突泉地中涌出三尺許餘則方塘漫流清鑑毛髮康熙庚戌藩臬置酒邀提督楊宮保_捷忽大雷雨龍首入戶泉涌起丈餘水大上諸公急呼騎水頃刻及馬腹踣墜而死者數人從來未有之異也

陳玉筍

濟寧陳益修字玉筍恂恂君子也明崇禎末濟寧有回回楊生花等素豪猾武斷鄉里一旦欲毀關壯繆祠廟拓其居廬陳號名諸生鳴於官懲首事者廟得以存及鼎革之際生花挾舊憾帥其黨邀陳於天井闡箠之瀕死仍以刀刮其睛啖之以礮灰實目睚棄諸野外家人舁歸謂必無生理矣至夜

陳昏憤中見綠衣神人強之以酒外青內白痛稍差次夜復見一神人以手擊其腦後目中血出如注痛良已又次夜見一老嫗食以杏李又以羊眼盈把令口吸之比覺雙瞳炯然矣生花及其姪樸乘亂爲盜族誅去陳事纔八月也陳乙酉與弟尚謙同舉省試丙戌登第官貴池知縣仕至戶部主事予在京師見之

錦裙宋繡

陸魯望云瓦官寺有陳叔寶羊車一輪天后錦裙一幅予在金陵遊上瓦官寺猶見錦裙所製幡裙紺碧色錦作雲龍紋四角綴十二鈴焦山枯木堂有宋刻絲觀世音像亦奇古

六足龜

暹羅國進貢有六足龜十枚比至京師止存其三其足前二後四趺趾相連予在主客時見之

按龜三足日貢

羅漢

予在海陵一士夫家見毘盧國僧號羅漢自言明英宗土木之變始入中國能風雪中裸體而浴一日席上有胡桃羅漢以齒碎之凡數十枚舊住通州之軍山以遷濱海界徙居海陵高郵守某之祖傳有小像一軸像上畫一老僧相向坐自記此僧名羅漢毘盧國人一日守聞軍山有毘盧僧心疑卽其人試往謁乃與畫上老僧了無差別蓋已閱三世百年矣

丙丁龜鑑

丙午可未從古以爲厄歲陰陽家云丙丁屬火遇午未而盛

故陰極必戰亢而有悔也康熙丙午冬戶部尚書蘇納海督撫尚書王登聯等構死丁未春災祲豐見彗星出太白晝見白青出西北經月餘是歲七月輔臣蘇克薩哈誅死吾友程職方謂予欲哀輯前史所載丙丁災變徵應爲一書頃見宋理宗淳祐中柴望所上丙丁龜鑑十卷自秦莊襄王五十二年丙午迄五季後漢天福十二年丁未通一千二百六十載中爲丙午丁未者二十有一備撫事實系以論斷元至正中又有續丙丁龜鑑者補宋元事之闕前人已以此書當考據故明三百年中丙丁事應以續二書之後

白鳥

康熙庚戌六合縣民王振家庭樹產白鳥二督府麻勒吉表

進於朝

奇姓

予在儀曹時見有宛平人碧某者吏誤呼作碧其人不應問之云碧音如樊此萬姓統譜奇姓通諸書所不載者又任給事^琪云高密有高姓音閔又禱姓音卓諸城有則姓音支又壽光有鬢姓河南有驢姓吾邑有併姓壬子典試四川有副榜庚謀音拓明有指揮八通副將九聚近見山西鄉試榜有峯姓因姓

古銅器

庚戌臨淄人於古城畊田得銅器數百枚形製瑰異白諸官悉取入藩庫無從考其款識殊可惜也辛亥春京師草場火

火燼得石數千百皆有峯巒之形不測其故又明末河南鄆陵人浚城壕得石數百皆有人物鬚眉宛然或謂恐傷地脉掩覆之後有兵

地震定數

宋小說載崔公誼爲莫州任丘簿熙寧初河北地震而公誼秩滿挈家南歸一日宿孫村馬舖中風電陰黑夜半有急叩門者云傳語崔主簿君合係地震壓殺人數輒敢擅逃過河今已收魂岱獄到家速來崔自度必死乃兼程送妻孥至壽陽次日遂卒康熙戊中山東地大震莒州尤甚莒與日照縣鄰地震之夜凡日照人客莒者皆從崩壓中得不死莒人客日照者皆死信有定數己未七月京師地震通州尤甚死者

凡數百人

梨花漁人

會稽姜鐵夫梗說其鄉近歲有漁人獨居無家室所居有梨花數十樹人呼爲梨花漁人一夜月明放舟湖中聞岸上有人呼渡移船近之未抵岸其人已在舟中矣視之尼也年可十七八衣縞而姿首甚麗詰所從來不應將及家登岸穿林冉冉而去漁人心知非人明日晚歸燈火熒然則尼已先在室中矣漁人稍疑懼尼曰我非人也居湖邊某村父母自幼送我爲尼今年月日死以與君有夙緣故來相從且君當得佳婦亦須我爲作合幸勿訝也自此鷄鳴而去夜卽復來如是將一載鄰里皆聞漁人室有異香里中某氏有女及笄一

日忽有鬼物憑之言禍福多奇中且云汝女病惟某漁人善醫且夙緣當爲某婦否者死矣其父母懼邀漁人至其家漁人不知所以固辭歸迨暮尼復來告曰我與君夙緣已盡當從此辭此女當爲君婦祟卽我所爲君何辭耶漁人誼不負心因與盟誓尼感動泣下亦不復強明日漁人以告女之父母鬼遂不至不數月漁人竟卒

麟

宋荔裳琬觀察說其鄉趙鵬程者官彰德太守府庫中有一麟相傳明武宗時土人所獲誤斃之以獻於官貯庫中趙任滿欲取之吏不可乃斷其一脛攜歸毛作黃色紋理如刻畫蹄通明類黃玉宋常見之

慶忌

萊人張允恭明天啓壬戌進士爲南陽守浚河役夫夜宿岸側聞橋下每夜有哭聲共伺之乃一巨鼈因置鐵鑊烹之忽獲中人語曰勿殺我我當利汝衆懼益烈其火少頃無所聞啓視之鼈已死剖腹得一小人長數寸許睂目宛然以獻於守攜之歸識者謂卽管子涸澤之精名曰慶忌是也康熙壬子歲濟南人包鼈亦於腹中得小人如回回狀人多見之

楊李

隋末酸棗邑所進玉李一夕忽長清陰數畝是夕院中人聞空中語云李木當茂帝欲伐之左右曰木德來助之應也不可伐又楊梅玉李同時結實帝問二果孰勝院中人曰楊梅

雖好不若玉李之甘帝歎曰惡楊好李豈人情哉又民間歌
云河南楊花落河北李花榮楊花飛去落何處李花結果自
然成南唐將受吳禪江西楊化爲李信州李生連理其事前
後略同又鈞磯立談載武義中童謠云江北楊花作雪飛江
南李樹玉團枝李花結子可憐在不似楊花無了期與隋謠
亦相類

記前生

同年濟寧邵嶧輝士自記前生爲寧海州人纖細不爽後以
己亥登進士爲登州教官親至所居里訪其子得之爲謀生
事且教之讀書爲諸生又自知官止縣令及遷吳江縣知縣
遂辭疾歸又其妻早卒邵知其再生館陶某氏俟其髻而聘

之復爲夫婦河南張給事文能記三生事李御史嵩樂安李

貢士煥章皆能記前生事此耳目視記之尤著者

萬維嶽

順天萬維嶽嵩中順治丁酉京畿解元康熙庚戌成進士其

入學題乃夫子循循然善誘人食餼則博我以文約我以禮

丁酉領解首題卽顏淵喟然章明年世祖御試題則克

已復禮爲仁自謂平生與復聖有因緣比庚戌會試三書題

無顏子語自謂當落第榜發中式房師乃儀制主事曲阜顏

修來光敏也

丁貞女

丁貞女聊城之沙鎮人靖難功臣某裔也貞女幼孤無兄弟

依母以居及笄母欲議婚貞女曰母老矣又鮮兄弟不願適人願終身養母母不能強及母卒從兄某爲議婚貞女又不許獨處三十餘年年五十矣聞範嚴肅里中人咸稱曰貞女堂邑黃中丞圖安七十喪偶聞貞女之名遣聘焉貞女先一日名其從兄語曰明日當有議婚者至吾將許之兄及姊姪輩謾應弗之信也詰旦黃氏蹇修已及門先是貞女縞衣數十年是日乃易色服既許字卜吉葬母始于歸黃氏猶處子也中外子孫多人待之皆有恩禮東昌人傳爲美談

魏舍人妾

魏舍人麟徵納妾京師甫一月妾病且殆求歸母家已而延魏至榻前操吳音曰某前生姑蘇人君前生逋吾五十金今來

索償事畢矣此去當生平陽某氏年十八卽中甲科復與君有後緣語訖而逝此康熙辛亥春正月事也

莫如

孫侍郎退谷先生說昔爲祥符令有人發一古冢乃東漢馬武妾葬處中有石卽武爲其妾自製誌文甚古字畫精絕又有香奩一具中貯脂粉皆宛然奩底一小銅印鐫妾莫如三字印在孫處碑歸張給事文光家今不知所在急就篇有解莫如之句注云漢有毛莫如

義贏

同年張鶴洲行人吾嘗乘一贏甚愛之康熙甲辰鶴洲以科場事下刑部體弱不繼乃以贏抵逋於人一日過市酸嘶悲

鳴墮其新主而逸歸張邸稍近之輒蹄齧不已家兄考功爲賦義羸行嗚呼此羸勝華歆賈充褚淵六臣之徒多矣

龍睛

吳江金文通公^之俊生時母夫人夢人告曰與汝子龍睛將來位極人臣公大拜後蕭山瞽者陳生善相人試令相之曰乞兒相也衆駭笑已而至日大驚曰此龍睛也當貴極人臣衆乃服能改齋漫錄載陸農師言曾魯公得龍脊王安石得龍睛

追寫真

宋憲使荔裳^琬幼失恃每憶母夫人形容輒泣下吳門某生者自言有術能追寫真人歿數十年皆可得其神似乃令設

壇淨室中自書符咒三日陳丹青紙筆令宋禮拜出扇鏹其戶戒母譁比夜忽聞屋瓦有聲已夜分聞擲筆於地鏗然屋瓦復有聲生乃開戶引視之燈燭熒然丹青縱橫筆落地上而紙仍緘封未啓視則像已就宛然如生宋捧持悲泣重酬之生云過六十年則不復可追也蘇穀原道旃瓌言云澶淵宋僉憲敬夫幼失怙不識父形容請方海山人貌之持歸家母夫人視之如生悲不自勝世或有此理耳

善謔

京師有市猾某者本騾馬行牙人以附黃廳李至巨富一日堂成讌士大夫壁間有孔竇客疑問之答曰手脚眼也蓋工匠登降攀附置手足處宋荔裳在坐應聲曰吾有對句矣乃

頭口牙也合坐大笑又萊人某者以散官居旗常狎一婦婦齧其舌持赴刑部令急騎追之宋適往視戲曰君所謂駟不及舌

前定

世事莫非前定所云動乎四體有不知其所以然者往予在淮南好觀棧道圖有興化顧生符楨工此技妙入毫髮予令畫絹素屏扇凡十數自爲長歌題之復以其一贈姊夫劉大田傳既而予有入蜀之役同行卽劉君也辛亥歲在京師沈文恪繹堂荃爲侍讀以小冊索書予爲書陸放翁詩云殘年作客遍天涯下馬郵亭便似家三疊淒涼渭城曲數枝閑澹閬中花擘牋授簡相逢晚理髻薰衣一笑諱俱是邯鄲枕中

夢墜鞭不用憶京華比入蜀信宿閬中乃憶前事真詩識也因賦一詩寄沈葭萌關外極天涯長憶西園夜鬪茶萬事輸他前定在今朝真看閬中花曩丁未歲四月二十九夜夢中得絕句云溪鋪翡翠映煙空溪上飛橋落彩虹愛玩花叢憶元相一枝渾臥碧流中既覺不知所謂末句則元微之使東川所賦亞枝紅詩也至是過褒城亦驗予已酉奉使淮上過奉高閣泰安州誌至羸博字輒心惡之辛亥壬子遂連遭渾沂兩兒之痛入蜀時過百牢關作一詩懷諸兄結押廬字忽心動曰廬廬居也得勿不祥乎又閱劔南詩有云成都放榜第一人楊姓具慶下愴然有感又心惡之比榜放解元果楊兆龍也心益動時先慈宜人已見背予在萬里外未知也昔

阮孝緒於鍾山聽講母王忽病兄弟將名之母曰孝緒至性冥通必當自到果心驚而返信有是哉

工人善琴

萬曆末詹懋舉者守潁州偶召木工詹適彈琴工立戶外矯首畫指若議其善否者呼問之曰頗善此乎曰然使之彈工卽鼓前曲一過甚妙詹大驚異詰所自工曰家在西郭外往見一老人質薪入城擔頭常囊此因請觀之聞其彈心復悅之遂受學耳詹予以金不受曰某賤工也受工之直而已又曰公琴皆下材王有琴卽老人所貽今以獻公果良琴也詹乃從竟學一時琴師莫能及

盧昭容

古月頭陀歛人胡姓名明勳字半菴順治丙戌居京口兩膝忽患瘍痛入骨髓數日宛成人面眉目口鼻皆具易醫一百三十餘人瀕死者數矣辛卯十二月七日瘡忽人言曰我梁時盧昭容也子害我於洛陽宮今日報汝醫何能爲詣佛懺悔可耳旣甦卽謝醫發願書經書水懺至九卷遂杖而起終三十六卷復閉關書法華經華嚴經各一部遂能行又書涅槃經金光明經心地觀經報恩經金剛經凡五百萬字瘡竟愈後在真州有降乩者書盧昭容邀半菴與會自畫生時像首飾鳳髻衣宮衣問半菴洛陽宮相見今似否胡爲悚然胡天啓中官中書舍人嘗收左忠毅公骸骨云

義虎

汾州孝義縣狐岐山多虎明嘉靖中一樵人朝行失足墮虎
穴見兩虎子臥穴內深數丈不得出徬徨待死日將晡虎來
銜一生糜飼其子既復以餒予樵懼甚自度必不免追跡
爽虎躍去暮歸飼子復以餒與樵如是月餘漸與虎狎一日
虎負子出樵夫號曰大王救我須臾虎復入俛首就樵樵遂
騎而騰上置叢箐中樵復跪告曰蒙大王活我今相失懼不
免他患幸導我通衢死不忘報虎又引之前至大道旁樵泣
拜曰蒙大王厚恩無以報歸當畜一豚縣西郭外郵亭下以
候大王某日日中當至無忘也虎領之至日虎先期至不見
樵遂入郭居民噪逐生致之告縣樵聞之奔詣縣廳抱虎痛
哭曰大王以赴約來耶虎點頭樵曰我爲大王請命不得願

以死從大王語罷虎淚下如雨觀者數千人莫不歎息知縣
萊陽人某也急趣釋之驅至亭下投以豚大嚼顧樵再三而
去因名其亭曰義虎亭宋荔裳苑作義虎行王于一猷作義
虎傳紀其事

客氏刺

順治己亥在京師於慈仁寺市見鬻故書者賣一敝刺大書
客氏拜三字竇應朱國禎克以三錢得之賦客氏行予笑曰
使當天啓時此一紙過詔旨遠矣

驕

先太師公會於塞上得馬一角按爾雅驕如馬一角注元康
八年九真郡獵得一獸大如馬一角角如鹿茸卽驕也王會

圖有俞人之雖馬注雖馬一角

來陽伯

來陽伯復三原人神於醫尤多技術常使人脫靴脛隨之長幾丈許靴亦如之尤精女紅官吳中時刺繡之妙吳中閨閣無能及者來三原人萬曆中進士官至布政使

啖石

仙人煮石世但傳其語耳予家傭人王嘉祿者少居勞山中獨坐數年遂絕煙火惟啖石為飯渴即飲溪澗中水遍身毛生寸許後以母老歸家漸火食毛遂脫落然時時以石為飯每取一石映日視之即知其味甘鹹辛苦以巨桶盛水掛齒上盤旋如風後母終不知所往

周府馴虎

先祖方伯公為河南按察使時周王府有馴虎日惟啖豆腐數斤猛虎如此何異騶虞

楊世榮

楊世榮者汾陽人以醫器為生夜夢人告之曰汝富貴至矣覺則身忽長二丈餘一衣須布十八疋每食啖一豕羊用一鐵鞭重百六十斤鄒平張方伯毓時知縣事錄為民壯後遷寧武道以之自隨會流賊亂每步戰殺賊賊皆披靡以積功至叅將鼎革後不知所終

金蠶

先太師舊有金蝦蟇一枚崇禎辛未潰卒陷城一賊得之置

腰間輒爬其腹如是者數四賊怒擊破之有白氣冲天而去

劉張二仙

劉吏部公誠仁體劉先生傳云劉任字弘父潁川人生而一瞳子正方登隆慶丁卯賢書嘗著書巾衣淺紅窄衫乘駿馬挾彈林薄間一日謂家人曰仙伯期我海上某日暫還題一詩有明白來時明白去君看直北起雙鳧之句遂瞑後十五年有故人從燕中來者云見先生書一詩於西山蘭若僧曰日者一先輩畱此亦時時往來寺中問其狀則先生也遲寺中數日待之不復至矣又同里張葵孝廉者髮長等身無一莖異七歲時讀書樓上忽一黃冠來告曰從吾步空下卽仙矣葵有難色黃冠叱之卽能步空下居城東十里許一日有道

士服過之者曰吾望氣而來乃子耶幸勿墮落遂別去然張竟無他異

鳩食麥

康熙癸丑吾邑早東山曹村有鳩千百成羣食麥近羽孽也

蠟蠹硯

張華東公延登崇禎丁丑二月遊泰山宿大汶口偶行飯至河濱見水中光芒甚異出之則一石可尺許背負一小蝠一蠹腹下蝠近百飛者伏者肉羽如生蠹右天然有小凹可以受水下方正受墨公製爲硯名曰多福硯銘之云泰山所鍾汶水所浴堅勁似鐵溫瑩如玉化而爲齏生生百族不假雕飾天然古綠用以作硯龍尾繼躅文字之祥自求多福爾雅蝠

蝠服翼郭璞注齊人呼爲蠟蠹因又名之曰蠟蠹硯公門人
劉文正理馬文忠世夏考功允高中丞名諸公皆爲銘贊亦
奇物也

荊州鏡窵

荊州有某氏子素亡賴一日於後圃築墻夜夢一美女子前
拜曰妾在地下數百載矣修煉將成明日大劫懼不可逃惟
君救之妾胸前有古鏡一枚君慎勿取但爲妾復掩其藏誓
報厚德覺而歷歷能記明日集畚鍤掘地未丈許果得一棺
發之中有女子古粧靚服顏色如生胸前有鏡方圓數寸寒
光射人毛髮某憶夢中語欲掩之其僕曰鏡必有異第取何
害某遂取之女子忽化爲灰燼某駭甚遽掩其棺是夜復夢

女子泣告曰吾煉形已成爲汝所敗然自劫數應爾於汝何
尤汝但珍護吾鏡吾當福汝某遂寶鏡虔奉之鏡時時有聲
一旦女子來曰楊相公開府江陵思得奇才共濟此功名之
秋也試往軍門獻策吾當助汝時武陵楊相國督師駐荆某
信其言遂往上謁楊公與之語某談兵料敵高議縱橫不可
窮詰公奇之延致幕中每有戎機輒與參決將聞於朝官之
一日某以小過箠其僕僕竟死方在幕府不知爲計女子忽
至曰無傷也君但請暫歸休沐輿尸以出吾能護汝如其言
至轅門忽輿中血出如注軍校輩驚視之得僕屍馳報府中
召某問之但云罪當死旣而語以兵事亦惜然不復能對公
怒究其故某始對以女子所教已都不知今鏡尚在公命取

鏡鏡忽作大聲飛去自是女子不復至矣某竟瘵死獄中鄭禮部次公日在成都說

吳道子水陸畫

平陽普菴堂有吳道子畫水陸百二十軸明世宗朝西河郡王城北有隙地傳爲廢寺址其地中間方數尺雨雪不濡中夜常見光怪王令人持畚鍤發之五丈許得石函以鐵緹二道束其外發之又得錫函最中函以木木函啓軸見乃吳道子真蹟也王甚珍之王薨嗣王以乞揮使呂某呂又死其家貧落寺僧以恆直得之此崇禎間事予兄西樵使山右爲賦長歌今載集中

兩中式

儀制郎中武進巢五一震順治壬辰會試中第一百六十二名以磨勘革去中式乙未會試復中第一百六十二名名次毫釐不爽信事有定數也兵科給事中周根邵南宮人丁酉庚子亦兩中順天鄉試辛丑成進士按宋章惇曹冠冠秦檜客也皆再登第

魚舅魚爺

蜀中自嘉定至隆慶江間有魚曰魚舅楊用修異魚贊云嘉州魚舅載新厥名鱗鱗迎勝夫豈其甥其文實鰭江圖可徵或以爲嘉魚非也嘉魚出丙穴在漢中府桃花時則從穴出亦名鮓魚或名鮓爾雅曰鮓當鮓郭注海魚似鮓而大鱗肥美多鮓今江東呼最大長三尺者曰當鮓說文鮓當互也正

字通鮓呼故切鮓別名一名鮓鮓其九切俗作鮓非鮓他鼎
切鮓魚名異魚圖贊鮓魚極眇一斤千頭名曰鮓鮓不以網
收廣東文昌縣有井出巨魚紅頂名魚爺見一統志

池北偶談卷二十一 目錄

談異七之二 凡六十五則

每牛雖馬菌人蟬人

銀杏樹觀音像

唐童子

體香

黃鬚

柳耆卿墓

普救寺

神女廟神鴉

三僧

一字字

趙廣戴祿

古石刻

墨魚

鐵漢和尚

駙馬

厚葬薄葬

鳥異

二玉璽

青原道場

冰山

異鴉

昭烈券

蜀府鬼

馬岱後

張儲

孝芝

十具牛

壽冢

千里人

畢尚書

謔語

排調

引經

士大夫

兩周盤龍劉桃枝

程蘇謔語

孫忌語

雙塔

何老菴

虹橋板

漢人唐人秦人

真龍石龍

淨池魚

五行

常熟三鼎甲

杜氏

秦宣太后晏子語

姚康伯

李頻

寶藥

追尊始祖

沈石兄

棗栗

一生七子

郝推官

林四娘

秦時人

離非女子

謝在杭

南江野人

尼涵光

陳伯史

宋齊丘語

漢碑異姓

香山壘

卷二十一日畢

池北偶談卷二十一

談異

濟南王士禛阮亭著 高都姪廷掄簡菴較

每牛雖馬菌人淨人

予在禮部見荷蘭所進西洋小牛異之考王會圖所載有數
楚之每牛注每牛牛之小者王會圖又有兪人之雖馬注雖
馬一角大者曰麟按爾雅驕如馬一角不角者騏大荒南經
曰蓋猶之山有小人名曰菌人東經有小人國名靖人或曰
淨人

銀杏樹觀音像

辛丑壬寅間京口檄造戰艦江都劉氏園中有銀杏一株百

餘年物也亦被伐及工人施刀鋸則木之文理有觀音大士像二妙髮天然衆共駭異乃施之城南福緣菴中時蘇州瑞光寺有觀音像亦大木中文理自然結成之

唐童子

松江唐童子勲五歲而瞽年十二詩多可誦其先有汝詢字仲言者亦瞽而能詩嘗註唐詩傳於世周宿來茂源贈童子詩云家風師曠遠家學卜商傳又永平孟元輔熊源忠毅公子少而失明好讀書聽輒成誦嘗選唐人詩五十家亦奇人也

體香

先考功西樵於癸丑七月廿二日以哭先淑人不起屬續時口鼻中作梅檀蓮華蘭蕙種種異香凡三日夜益都高木王

粹予從姊之夫孝友忠信人也以康熙甲寅春捐館病革時體中亦有異香此皆予聞見最確者

黃鬚

宋范公稱過庭錄載黃鬚傳卽今所傳虬髯事也然其間云於汴州見太宗殊紕謬黃鬚兒曹操呼其子彰而此傳李衛公所遇亦稱黃鬚

柳耆卿墓

儀真縣西地名仙人掌有柳耆卿墓按避暑錄柳死旅殯潤州僧寺王平甫爲守出錢葬之真潤地相接或卽平甫所卜兆也予真州詩云殘月曉風仙掌路何人爲弔柳屯田

普救寺

西廂傳奇河中有普救寺畫墁錄郭威宿師河中途年登蒲
阪以望城中憤蒲民固守曰城開日當盡誅之幕府曰若然
守愈固矣第告之曰誅守城者餘皆免城既開乃卽其地爲
普救寺蒲志云舊名永清院院僧與郭威約城克之日不戮
一人因改名普救寺二書大同小異然寺名實始五代傳奇
假以成文耳

神女廟神鴉

巫峽神女廟有神鴉迎送客舟陸放翁入蜀恨不及見予壬
子冬下三峽至十二峯果有鴉十餘往來旋繞以肉食投之
卽攫去十不失一其鴉比常鴉差小栖絕壁石洞中得食卽
入洞去天祿閣外史曰嘉陵之墟其鳥曰鳶臨溪啄影則孕

吐於口而生方密之以通雅云嘉陵漾江之口下至巴東皆
有神鳥所謂嘉陵之鳶指此或謂山鳥穴乳卽爾雅之鷦

三僧

坡詩有琴聰蜜殊謂僧思聰仲殊也放翁筆記云思聰大觀
政和中以琴遊權貴間遂還俗官御前使臣仲殊自縊以死
參寥尤爲坡公所喜政和中老矣亦還俗又墨莊漫錄載呂
溫卿爲浙漕屢起大獄復欲網羅參寥參寥本名曇潛東坡
改之曰道潛呂索牒勘驗竟坐刑之還俗編管兗州

一字字

筆記云錢勰字穆范祖禹字淳本皆一字予按古如爰絲房
喬顏籀劉父之類皆一字字也今文士有寶應陶澂字季萊

陽董樵字樵二人皆以布衣遊於都門初不相識予爲介之
曰二君非但詩筆相當卽一字字亦絕對也二君遂賦詩定
交按龍川別志有隋時道士屈突無爲字無不爲晁景迂一
字伯以父見陸務觀文集劉敞劉攽兄弟字伯貢父仲原父
見歐公所作原父墓誌前涼張天錫字公純暇見十六國春
秋此又三字字也陶一字昭萬有太原傅山字青主一字公
之佗

趙廣戴祿

趙廣合肥人李伯時小史伯時作畫常令侍左右久遂善畫
尤工畫馬幾亂真遭亂爲賊脅之作畫不肯從斫其右手乃
以左手畫大士宋南渡士夫家所藏伯時大士多是廣筆戴

祿者臨邑邢子愿先生家僮亦精六書之學與子愿書往往
亂真邢與寒家有姻婭之好予幼時多見屏幃間署子愿姓
名率戴書也

古石刻

大梁城西水磨間土人掘地得一石有日月逝酒漿五字乃
古篆也周櫟園侍郎摹勒以傳謂非仙者不能道施愚山有
詩記之

墨魚

蜀嘉州凌雲烏尤山下有魚曰墨魚行則噴墨云郭璞注爾
雅於此魚食硯墨所化立春後泛子漁人以燈火照之輒止
不去南越志謂烏鰂懷墨而知禮蜀本草圖經云烏鰂名海

鯨鮪九月烏鷄入水所化不知卽此一種否予在蜀見之

鐵漢和尚

鐵漢和尚居金陵牛首東峯下獨坐數十年嘗蓄二猿子自隨有所須猿輒解意與龍眠方學士坦菴撰善特構一軒方來卽居之號曰坦軒和尚化去二猿悲鳴不食死葬於塔側學士題其遺像云兩箇獼猴杖一根獻花石上獨稱尊怪公事事能超脫畱此賊私誤子孫

駙馬

懶真子云御馬之副謂之駙馬杜預尚主武帝拜鎮南大將軍給追鋒車第二駙馬吾鄉有爲尚書子壻者與婦兄同赴京師一日向友人訴廐吏云婦兄馬肥吾馬獨瘦友人笑答

曰彼正馬也君駙馬耳那得一例合坐大笑此雖戲語深合故實

厚葬薄葬

秦始皇穿治驪山上具天文下具地理漢文帝遺詔霸陵山川因其故毋有所改二君之賢愚人皆知之乃亦有相反者宋壽州張侍郎撫州晏丞相俱葬陽翟相去數里有盜發張墓得金寶珠玉甚多遂完其棺槨掩覆其穴繼發晏公墓無所有器皆陶甃破其棺惟木胎金裹帶一盜失望大恚以刀斧碎其骨而出世謂張以厚葬完軀晏以薄葬碎骨事之不可知如此

烏異

益都縣顏神鎮康熙辛亥冬鳧鴈鴛鴦之屬以千萬計飛過城中皆墮地死遠近四山皆滿甲寅春復然已而相國泚亭孫公廷銓薨於私第公世爲鎮人

二玉璽

順治十七年富陽典史孫某解餉北上舟過高郵見湖中夜有光令榜人跡之得玉璽水中方四寸六分盤龍雙紐辨其篆文漢高帝大風歌也十二月疏獻於朝鄧州人丁象輝賦大風玉璽歌又康熙四年十月初八日溧水民耕田得玉璽其文乃人心惟危十六字亦上於朝

青原道場

龍眠無可和尚本方姓故明崇禎庚辰進士早以文詞知名

亂後爲浮屠會住金陵高座寺劉公戡見之衣壞色破衲衣行纏束腰居然苦行頭陀也最後住吉安青原山青原古道場也明王陽明鄒東郭南阜諸先生亦講學於此住山後有倒荆久枯忽發三楹會施愚山閏章分守湖西講學白鷺洲與之往來青原宗風一時復盛

冰山

康熙戊申予邑北錦秋湖中冰立如山高可數丈許巖洞林巒皆具千峯萬壑宛轉關通遠近走觀之入其中者如在深山而表裏洞徹類晶玉旬日始消

異鴉

邑東北耿氏墓林中有鴉一隻碧色飲啄自異不與羣鴉爲

伍亦不見其蕃育人往往見之按唐書滕縣有羣鳥噉柴爲城中有白烏碧烏各一又城東旬名店有白燕二居民家井中皆康熙十二三年間事

昭烈券

獻賊破荊州時民家有漢昭烈帝借富民金充軍餉券武侯押字紙墨如新見綏寇紀略

蜀府鬼

獻賊據成都以蜀王府爲宮所居人鬼相觸一日聞後殿有歌吹聲自往視之見有數十人手持樂器而皆不見其首大驚仆地乃移居北城樓不敢入宮

馬岱後

黎州土司馬金者蜀漢將軍馬岱之後張獻忠在蜀以金印招之金得印擲之地誓衆拒之金時年十六未幾卒

張儲

張儲字曼胥南昌人大學士位之弟多才藝醫卜星相堪輿風角之術無不通曉萬曆間遊遼東歸語人云吾觀王氣在遼左又觀人家葬地三十年後皆當大貴行伍閭巷中兒童走卒往往多王侯將相天下其多事乎人以爲狂旣而其言果驗儲年七十餘卒其外孫夏吏部抑公錄云

孝芝

洛陽呂忠節公維祺撰孝經大全三十年至崇禎十三年庚辰告成夢神人錫以丹篆又袖出一物如黑節倏生二白角化

爲黃紙羊約七八寸優游草際謂公曰此孝芝也明日果有芝生庭中凡十八莖剗者誤去一莖明日復生說者謂應十八章之數云公自作孝芝記

十具牛

王景略臨終托其子皮十具牛爲治田之資不爲求官亦葛侯入百本桑之意今江淮以北謂牛四頭爲一具俗語亦有所本

壽冢

梁國兒仕姚秦封平輿侯嘗於平涼自作壽冢將妻妾入冢飲讌酒酣升靈牀而歌入十餘乃卒可謂達者近淄川高侍郎念東亦自作生壙時與友人唐翰林濟武夢飲酒賦詩

其中德州程工部正夫先自作一棺題曰休息菴先自作銘刻其上酒酣便卽偃臥有詩云版屋蕭然密四周愚人息矣聖人休百年恍惚真疑夢萬事紛紜已到頭廣柳何時催去駕猗蘭此夕詠閑愁相煩雅客來欣賞莫待遙憐土一丘

千里人

南燕慕容超時高句驪獻千里人十人

畢尚書

淄川畢白陽自先生明崇禎初爲戶部尚書精心會計爲時名臣時練餉新餉諸項日增臺諫多歸咎司農一言官以亢旱上疏有烹弘羊天乃雨之語先生笑謂人曰此非烹弘羊直是要烹白陽耳

謹語

王完虛中丞點明萬曆甲辰進士好詼諢初仕為鄒平知縣縣與章丘接壤一日與章令某相見令問足下以何年生對曰乙亥因問章令答云亦乙亥王笑云某是鄒平一害兄便是章丘一害

排調

同年薛給事奮以才氣自許常在淮陰酒間謂予云子文士耳異日終依我幕下予答曰恨吾子非嚴鄭公耳汪荅文亦有詩調之云十載雕蟲稍擅名未曾縛袴學長征他年若得登三事但取蕭郎作騎兵

引經

德清陳端菴凝順治己丑進士筮仕為新城令性仁厚每杖人輒對之泣有王生者宅為人所奪久不給直訟於官陳不能決第好語曰毛詩云維鵲有巢維鳩居之王秀才獨不能作鵲耶聞者笑之

士大夫

南史紀僧真得幸齊世祖請於上曰臣出自武吏階榮至此卽時無復所須唯就陛下乞作士大夫上曰此由江敎謝淪我不得措意可自詣之僧真承旨請敎登榻坐敎顧左右曰移吾牀遠客僧真喪氣而退告上曰士大夫固非天子所命六代時士大夫之重如此

兩周盤龍劉桃枝

蕭齊時兩周盤龍一奉叔之父於淮陽大破魏軍一徐州民
與建康僧法智作亂爲王元邈所誅南北朝兩劉桃枝一北
齊人洋湛間多拉殺諸王大臣在涼風堂殺斛律明月者一
陳威鹵將軍克齊朐山城

程蘇謔語

元祐初司馬公薨百官方有慶禮事畢往弔伊川引子於是
日哭則不歌東坡云云然檀弓衛太史柳莊寢疾公曰疾革當
祭必告公再拜稽首請於尸曰有臣柳莊也者非寡人之臣
社稷之臣也聞其死請往不釋服而往遂以禭之又梁左軍
將軍馮道根卒是日上春祀二廟問中書舍人朱异曰吉凶
同日今可行乎异引衛獻公以對上卽幸其宅伊川何未衷

於此樂城遺言載此條則是穎濱事非東坡

孫思語

南唐孫思語馮延巳曰僕山東書生鴻筆麗藻十生不及君
談諧歌酒百生不及君諂佞險詐累劫不及君

雙塔

京師雙塔乃安祿山史思明所造而劉侗景物略不載元廼
賢易之詩云安史開元日千金構塔基世尊寧安福天道自
無私寶鐸遊絲罽銅輪碧蘚滋停驂指遺蹟含憤立多時

何老菴

吾邑東六七里有何老菴何元時人修道於此獨居數十年
每夜有蛇虎伴之菴後有積水曰秦龍池相傳何老擾龍處

虹橋板

榕城書肆有虹橋板一片色黝而澤文理堅栗發聲清越材中琴瑟云產武夷山中不辨何木也興化林穆之賓賦虹橋板行記其事

漢人唐人秦人

昔予在禮部見四譯進貢之使或謂中國為漢人或曰唐人謂唐人者如荷蘭暹羅諸國蓋自唐始通中國故相沿云爾馬永卿引西域傳言秦人我巧若馬注謂中國人為秦人各以通中國時為稱古今不易也

真龍石龍

宋中丞牧仲榮說順治二年在京師見大內所藏真龍全身

盤屈貯篋中一角五爪鱗甲如鐵長丈餘陳宮詹說敬說康熙十四年陽城張侍郎東山爾家鑿石中有石龍一鱗甲頭角宛然刻畫亦長丈餘

淨池魚

宗弟九青侍講嘉扶風人家渭水上去太白山二十里云太白一峯直上三十里盛夏雪霰不絕人無能登其巔者惟六月可上上有太白神殿以鐵瓦覆之有五池有鳥紅色大如雀池有萍穢則啣去之名淨池烏山奇寒無林木鳥獸此鳥亦不知栖止何所也按客座新聞云每墮葉則鴛鴦鳥啣出之紅魚有長丈餘者

五行

陸象山云五行書以人始生年月日時所值晨推貴賤貧富
夭壽禍福甚詳乃獨略於智愚賢不肖曰純粹清明則歸之
富貴福壽曰駁雜濁晦則歸之賤貧夭禍易有否泰君子小
人之道迭相消長各有盛衰純駁清濁明晦之辨不在盛衰
而在君子小人今顧略於智愚賢不肖而必歸之富貴貧賤
壽夭禍福何耶沙隨程氏云易以道義配禍福陰陽家獨言
禍福而不配以道義如此而詭遇獲禽則曰吉得正而斃則
曰凶故文中子曰京房郭璞古之亂常人也二說可互證

常熟三鼎甲

常熟南門地名山塘港琴川水經處三鼎甲居第相望中孫
扶桑承恩前趙東田士春後瞿文懿景濂三公臚傳年皆三十九尤

奇扶桑弟舉人場爲予說如此

杜氏

康熙丁酉山東東昌府館陶縣民婦杜氏年一百十三歲載

縣志

秦宣太后晏子語

國策楚圍雍氏韓令尚靳求救於秦宣太后謂尚子曰妾事
先王日先王以婢加妾之身妾固不支也盡置其身於妾之
上而妾弗重也何也以其少有利焉此等淫褻語出於婦人
之口入於使者之耳載於國史之筆皆大奇又晏子春秋景
公蓋姦圉人視景公僭者問之曰竊姦公也公將殺之晏子
入見公曰色寡人故將殺之晏子曰嬰聞拒欲不道惡愛不

祥雖使色君於法不宜殺也公曰然若沐浴寡人將使抱背
此段問答亦奇

姚康伯

崇禎時內殿石驟長數寸上以問大學士何文端公如何謝
不知歸問其老友姚康伯康伯曰此璞也中必有玉翌日以
對上命剖之果得玉上訝其博物何謝曰臣友姚康伯教臣
也因召見欲授以官不受姚字休那與文端俱桐城人張學
士敦復英說

李頻

唐詩人李頻字德新睦州人名列唐書文藝傳才調集所載
中流欲暮見湘煙一篇其作也懿宗時爲建州刺史卒見神
黎嶽郡人祠祀之宋紹興中封靈顯忠惠公後加靈佑善應
王再加廣濟王又加福佑威濟信順王明洪武初改建州刺
史之神載在祀典宋真文忠公序其詩今所傳黎嶽集是也
詩人歿而爲神未有如頻之昭昭者

寶藥

江浦周西水兵部名于漆幼不能言然頗能記前世爲某邑
人所常栖止處廣庭中設一几庭前有紅薔薇一叢時時夢
到其地七歲時戲門前有僧過門顧之曰此郎有夙因周應
聲卽能言家人驚喜因令讀書一過目如宿習數月徧通經
書左國史漢年十四讀書山中精舍一日日夕憩溪邊石上
遇老僧謂曰郎忘七歲門前相見時耶叩其名曰我寶藥也

閩人周因留之舍中日夜與論象緯律曆六壬丁甲勾股洞章之術未半載盡通其說瀕行復以黃河海道九邊三圖授之且曰吾數學未傳人今當遊四方訪之又祕語周以十年之內天下必大亂君異代人物也自丙子迄甲申果九年而明亡皆如其言周入 本朝以明經謁選人常念寶藥別時贈詩有元夕燈前尋賈子秋風臺下拜鄒生之句未詳所謂及謁選得房山命上元與僚屬讌於賈公祠問之唐詩人賈閻仙祠也問有子孫乎吏對有賈某者其裔也見以逋稅繫獄周急令出之代完其逋是年秋調平谷令抵縣日卽出勘田畝夜宿山村古廟比晨視其額則鄒衍祠也於是悟寶藥之語一無爽焉周述其學著三才儒要三十卷

追尊始祖

唐以老子爲玄元皇帝蜀王衍追尊王子晉爲聖祖至道玉宸皇帝

沈石兄

萊陽沈石兄名迅明崇禎辛未進士官給事中鼎革後家居一日其傭奴鉏田見禾葉上皆有篆書如虫蝕者其文曰沈迅死是年沈禍作舉家自焚

棗栗

白虎通義曰婦人之贊以棗栗暇修棗取其朝早起栗戰慄自正也今齊魯之俗娶婦必用棗栗諺云早利子也義本白虎通而稍訛南宋時太學生齋祭用棗子荔枝蓼花曰早離

了也殊可捧腹矣

一生七子

明天啓中大名民家一生七子俱成立每疾病則七人同之
王比部命少寓天雄猶及見其第三子云康熙戊申安徽巡
撫張中丞朝疏報歙縣民吳士全妻呂氏一產四子同年李
望石贊說順治中按楚有漢川縣民王某妻一產六子按北
魏延興三年秀容郡婦人一產四男四產十六男與此相似

郝推官

郝某失其名嘗爲湖廣某郡推官一日送直指宿驛中夜坐
篝燈倦而假寐恍惚見有白衣女子鍼刺其額驚覺遂就寢
既臥又有刺其股者割甚急呼童子然燭視之果有鍼在

左股疑其刺客乃秉燭巡視室中空無所有至屋隅暗處有
緯蕭障之隙而窺焉見一物如大鳥人立遍體似水晶臟腑
皆見見人卽前攫急以手中挺逼之遂倚壁上不能起大呼
從人破牕而入挺刃交下乃死竟不知其何怪也劉吏部公
誠說

林四娘

閩陳寶鑰字綠崖觀察青州一日燕坐齋中忽有小鬟年可
十四五姿首甚美舉簾入曰林四娘見陳驚愕莫知所以遂
巡問四娘已至前萬福蠻髻朱衣繡半臂鳳背鞞腰佩雙劍
陳疑其仙俠不得已揖就坐四娘曰妾故衡王宮嬪也生長
金陵衡王昔以千金聘妾入後宮寵絕倫輩不幸早死殯於

宮中不數年國破遂北去妾魂魄猶戀故墟今宮殿荒蕪聊
欲假君亭館延客固無益於君亦無所損於君願無疑焉陳
唯唯自是日必一至每張筵初不見有賓客但聞笑語酬酢
久之設具讌陳及陳鄉人公車者十數輩咸在坐嘉肴旨酒
不異人世然亦不知何從至也酒酣四娘敘述宮中舊事悲
不自勝引節而歌聲甚哀怨舉坐沾衣罷酒如是年餘一日
黯然而離別之色告陳曰妾塵緣已盡當往終南以君情誼
厚一來取別耳自後遂絕有詩一卷長山李五絃司寇化有
寫本云又程周量會元記其一詩云靜鎖深宮憶往年樓臺
簫鼓遍烽煙紅顏力弱難爲厲黑海心悲只學禪細讀蓮花
千百偈閑看貝葉兩三篇梨園高唱

君試聽之亦悵

然

秦時人

遼東醫無閭山中有人斲參見毛人長丈許驚而却走毛人
招之曰吾非妖魅乃秦時築長城卒昔同輩數萬人今僅七
人在耳因問其飲食居處狀曰始饑食松柏實渴飲溪水久
之不復饑渴矣言已去如飛鳥友人某親聞之操江宜中丞
永貴云又巴山中有白髯叟采樵者嘗見之自云唐時人岳儀
部石齋貞說

離非女子

故友南粵陸漢東卿孝廉有小硯是南漢劉鋹宮中物有銀
宮人離非女子篆銘卿死子幼此硯不知流落何所石埭令

姚六康子為予言之姚亦粵人

謝在杭

謝在杭肇閩之長樂人少讀書邑蕭氏園園素多怪異人無敢居者謝不之信一夕坐燈下忽一女子前拜且泣謝叱之女子曰妾負冤久求公申之非魅也妾湖州德清人幼隨父客此同行某甲者中表戚也利父囊橐遂殺父恐妾鳴於官司併寘諸死今數載矣公異日必官於湖望逮甲窮治抵罪使妾家知妾父子死所父子目瞑矣謝許之戒勿復出為祟自是竟無它是年謝中鄉試果筮仕湖州推官抵任後即檄縣捕甲至一訊立伏遂抵罪郡人以為神姚禮部環曾令長樂為予言如此

南江野人

蜀張獻忠之亂遺民奔竄山谷久之遂為野人南江有二野人能手格猛虎恆擘犛鹿啖之懸崖絕壁騰上如鳥隼雖其家人親戚招之疾走不顧也岳儀部石齋南江人為予說

尼涵光

尼涵光江西宜黃人姓鄒氏歸譚大司馬綸之孫其夫稚魯不知書涵光棄去走京師上書請南遷不報會鼎革遂為尼每談故明門戶事源流甚晰居寶應朱秋厓克曾見之

陳百史

秀水張侍郎天植流塞外時一夕名乩仙仙至大書云我陳百史也今為尚陽堡土地因謂諸公可名吾兒來時其子掖臣

徙居尚陽家城外張謂城門下鑰請俟明日又書云渠今夕
飲城內某家往偵之果然比至凡書數百言皆言家事及訓
誠之語後在遼陽海寧相邸中亦往往見形與談笑如平生

宋齊丘語

宋齊丘表請與故吳太子璉絕婚曰非獨婦人有七出夫有
罪亦可出此與左傳人盡夫也之語可為絕對

漢碑異姓

金薤琳琅所載漢碑碑陰故吏門生姓名有絕異者如韓救
碑有庶次充宙番君加進元輝魯人恐卽弓如骨通孔宙碑
有叔香如盧浮海劇人薤章魯峻碑敢敦東鄉晨河間景君
碑羽質臨照水丘郎營中名闕字吳詩立遷又漢碑陰有

弟子洪丞相相隸釋謂親受業者門生次相傳授門童未故吏掾故民籍處士非
非民義士義民非又有故修行趙明誠謂後漢百官志注河
都穆謂當信碑本以正漢書之誤故午似是皂隸賤役

香山舉

舉門在香山縣大海中忽起一石埂廣十餘丈長六里許首
尾相屬不斷如蓮之有莖中途甕城名關闌踰之抵舉門則
如蓮葩番人依山築城廣袤四五里三面皆臨巨浸惟北通
地脉一葦耳海中諸峯包裹前十里為十字門如兩眉橫列
而缺其正中又南十里為小橫琴塞隘口又南稍折西為大
橫琴重案也番人之停舶必於灣灣之所在即名澳香山故
有澳名浪白諸番互市其中而今之舉門則舊名濠鏡地有

南北二灣、明萬曆中有大西洋人至此樂之、遂請濠鏡爲澳、而就二灣停船久之、益自彼國遣衆聚居、歲輸稅五百金、本朝除之、番人安其業者已數世、所居率依山爲樓三層、方者圓者、三角者、六角者、八角者、俱爲螺旋形、以入其教曰天主、其寺曰三吧、高十餘丈、於屋側啓門、戶石作雕鏤、金碧照耀、寺僧曰法王、以時集男女禮拜其所奉曰天母、名瑪利亞、抱一嬰兒曰天主、爲耶穌、被服珍怪、障以琉璃、望之毛髮生動、云漢哀帝時人也、寺有風琴、其琴銅絃、彈之以和經、唄并管、簫諸樂器、藏機木柜、聯以絲繩、輪牙相錯、一人轉機、則諸音竝奏、有定時臺、巨鐘覆其下、立飛仙臺、隅爲擊撞形、亦以機轉之、按時發響、起子末一聲、至午初十二聲、復起午末一聲、

至子初十二聲、晝夜循環、無少爽、前揭圓槃、書十二辰、俟某時鐘動、則蟾蜍移籌、指某位、有千里鏡、番人持之、登高以望、舶械仗、飄檣、可矚三十里外、又有玻璃千人鏡、多寶鏡、顯微鏡、小自鳴鐘、自行表、以及海洋全圖、璇璣諸器、皆極工巧、花有貝多羅、丁香、禽有五色鸚鵡、么鳳、倒掛獸、有猿、獺、短狗、其人昂鼻、捲髮、目深碧、不眴、貴女而賤男、晝臥而夜起、男有白黑二種、白者貴、黑者爲奴、衣以多羅、尼辟支、曳高屐、戴黑瓊笠、相見脫之以爲禮、腰佩長刀、刀著地尺許、間有握赤藤者、則甚貴、舉中四人而已、其女子則華滿寶鬢、出以錦被蒙其首、而跣足不襪、其家政女子操之、父死女襲其業、男子則出嫁、女家不得有二色、犯者女訴之法王、立誅死、或許悔過則

以鍊鈎鈎其手足，血流被體而免之。梟中有議事亭，番目四人受命於其國，更番董市事。凡市經四人議，衆莫敢違。及官司有令，亦必下其議於四人者，議得當以報聞，其行賈之地曰馬西。以中國絲帛白鉛、易胡椒檀香蘇木以歸，且與馬西約不得以所產市他國。康熙辛未，馬西背約私與他國市，梟人怒，駕舸往所市之國責之。馬西患之，遂相仇殺，死者三百餘人。市道中絕。稍西曰小西洋，去中國萬里，半年始至。所產有碧琉璃諸器。極西曰大西洋，去中國九萬里，三年始至。往者以其太遠，祇就旁島遷販，未嘗親至其地也。番船之出以冬月，冬月多北風，其來以四五月，四五月多南風，既出則梟中黑白鬼一空。計期當返，則婦孺遶屋號呼，以祈南風，亦輒

有驗。其舵工素與海習，雖卒遇颶，毋浮椒亦萬不失。一云右

見龔兵部衛圃

翔麟

珠江奉使記

池北偶談卷二十二目錄

談異七之三 凡六十則

銀瓦寺古鏡

短人

嶗山道士

宋孝廉數學

張谷山

陶松雲

李神仙

洞庭神

雷侍御子

前知

地震

梁尚書

劉尚書琴

王祭酒

民母鼻子

倉頡

靖州鷄鵝

趙解元



異馬異牛

波斯犬

梅異

籖驗

名龜

蜘蛛塔

義蜂豕

萬孔

謝鳳

懿徽二宗事相類

水晶

宋諸相八字

何中官

相國孫

宋三賢八字

左手把筆

故藩址

山無僧寺

米大僕研

煞風景

白帽子

宮侍御

名字

老子

論語識

王延喆

聖泉

蘇文

廈門磚刻

風聞

少正

郝氏遇仙

神黃豆

癸亥地震

族望

魚石

叫蛇

泰山孝子

蘇公墓

洞溪物產

成御史遇仙

響豆

卷二十二目畢

也七馬炎卷二十二目

池北偶談卷二十二

談異

濟南王士禎阮亭著 高都姪廷掄簡菴較

銀瓦寺古鏡

謝郎中方山重輝言明末德州修河堤於銀瓦寺前地中得古鏡一規製甚小照見隔城樓閣塔寺人物往來纖毫畢具寺僧深匿之今亡

短人

田少司寇漪亭雯言德州兵器庫自明季局鑄久順治初有司開視之於室奧壁下見一短人身纔尺許形如老翁徧體有毛左膝長跪左手垂而拳右足履地右肘拊膝而手承頤

鬚髮皓白攢眉閉目若悲苦之狀頃之雷電繞屋失所在

嶗山道士

嶗山又名勞山在卽墨界山中多一二百歲人有高密張生者讀書道觀觀有老道士形貌怪醜執樵蘇之役張意忽之一日買二牛其家去山百里餘苦無人遣送方躊躇頃道士忽謂張曰君似有所思得勿以牛故耶吾爲君送之張異其言逡巡已失牛比歸問家人曰某日某時有道人送二牛至億其時正立談頃也自是知非常人頗禮之又一日張爲其徒說周易道人從牕外聽之呼曰君所述皆俗說試叩之名埋出人意表生授其學遂以說易擅東方一日薄暮大雷雨震電張閉門從牕隙中見天神數百輩圍繞道士房如作禮

狀驚愕不敢喘息比達曙雨止開門視之道士門已反鐺寂無人矣是夜山中道觀數十百處皆見道士焉

宋孝廉數學

雲間宋孝廉幼清

懋

副都御史直方

徵

父也精數學直方生

時預書一紙緘付夫人曰是子中進士後乃啓視之至順治四年丁亥捷南宮開前緘有一行字云此兒三十年後當事新朝官至三品壽止五十後果於康熙丙午以宗人府丞遷副都御史至三品明年丁未卒官年正五十也又嘗與淮南白孝廉同年友善白亦精數學一日晨起謂夫人曰今年九月某日白兄當死渠無子我當渡江取別爲治後事遂買舟渡江比至白已候門迎笑曰我固知兄今日必來相送遂閉

門相對痛飲數日。至期白無病而逝。先生爲治後事畢乃歸。歸謂夫人曰：白兄事已完。吾明年三月亦當逝矣。如期而卒。宋有九籀集如稗官家劉東山杜十娘等事皆集中所載也。

張谷山

張谷山潁州人。日與小兒嬉戲。人不知其有道者也。張有表兄客薊州。一日除夕。婢方製餛飩祀先念夫而歎。谷山在側曰：婢無憂。吾爲婢。今日一至。兄所請寄餛飩爲信。穎去薊二千餘里。日未移晷已返。云適至薊見兄亡。恙婢笑其妄。谷山探懷出家書及夫昔所絮衣。云此豈妄耶。自是人始驚其神異。後入武當山。不知所終。遺二陶器盛夏盛肉不腐。此與萬回事相類。劉公戡吏部說。

陶松雲

陶松雲者居吳江。自云少時遇許旌陽。謂曰：吾弟子三十餘人皆在下界。汝其一也。今命汝以度人爲功。行汝其慎之。常有一士夫往謁陶求養生術。陶語人曰：此人不久當死。安望長生。問其故。云凡人作虧心事。一事則神縮一寸。今觀此君神纔數寸耳。竟如其言。

李神仙

利津李神仙者。占卜射覆多奇。中霑化李吉津宮詹呈在京。師一日問李前程事。李書一聯云：洗耳目同高士。潔披襟不讓大王。雄後半載宮詹以建言。流徙出關途次永平。有一秀才迎道。側具刺自言貧苦求資助。視其名則高士潔也。大駭。

歎及出關一守備王姓素受宮詹恩聞公至遠來相送因爲
誦前詩及第六句王駭曰雄卽某小字也李公太息以爲定
數不爽如此至康熙元年 詔許生還李公一日偶舉此事
語長洲尤太史展成 尤又駭曰此詩乃某昔年戲作論語
詩中之一也李今已老尚往來燕趙齊魯間

洞庭神

宋牧仲 學 言其鄉梁中翰 述 奉使西粵時道出洞庭風日晴
明呼風而渡忽雷雨驟至雲氣晝晦舟中人共見一神人美
鬚髯戴烏紗巾騎異獸行水上獸身半在波濤中僅露頭角
後一人形貌怪偉啣獸尾而行其速如飛去船里許人獸皆
漸騰上雲雨晦冥遂不復見舟人以爲洞庭之神也 梁丙戊進士後

官山東提學道僉事

雷侍御十

井研胡菊潭相國 世安 嘗說其邑雷侍御某爲縣令時生一子
八歲而夭後復生一子年七八歲一日晨睡不醒喚久之乃
覺自云適見其兄來呼入一山似非人境且贈之詩云三生
未了塵凡業一夕初完渾沌胎紫炁臺前千劫盡白羅天外
百花開正吟未句忽云父母喚汝可去爲我致問安好也高
念東侍郎說

前知

郭學憲 諫 福山人兵部尚書君弼先生 宗 曾孫言其縣人劉
某少雲遊四方餘二十年始歸明末山東亂諸郡縣皆嚴守

禦縣令名劉問休答劉云城必無恙守亦得不守亦得然某必死兵令笑曰城既無恙汝但畱城中何患劉曰數定矣不可逃也遂辭去至城西一村村人皆避兵他徙劉獨止不去適有兩人避兵過之劉指東路曰此去直東凡有山林處皆可避即途遇敵騎毋恐必無害兩人強之同行不可但云明日覓我骸骨於村西某樹下即爾君報我矣疾走勿復顧兩人不得已趨去道遇鐵騎絡繹竟免俘執兵去如約訪之果死樹下矣城亦無恙乃告於令葬之

地震

康熙戊申六月十七日戌刻山東江南浙江河南諸省同時地大震而山東之沂莒鄒三州縣尤甚鄒之馬頭鎮死傷數

千人地裂山潰沙水湧出水中多有魚蟹之屬又天鼓鳴鐘鼓自鳴淮北沭陽人白日見一龍騰起金鱗爛然時方晴明無雲氣云

梁尚書

鄆陵梁尚書廷棟官陝西一日按部河州有通官四人迎於道左其一人望見梁公股栗伏地比至稱病不謁梁怪之勒令出見一見怒甚即核其交通外彝侵冒軍實罪狀劾而殺之將服刑告人曰吾死固矣吾少時至一山寺見寺僧饒於貲吾以計殺而掠之今三十餘年矣頃望見梁公之貌宛然僧也又一目眇吾死固矣尚書從孫曰緝侍御熙說

劉尚書琴

鄂陵刑部尚書劉公訥前刑書璟子也性嗜琴嘗蓄一蕉葉琴其輕如蟬翼蓋古物也一日晝寢初覺見一黃衣人坐而鼓之其聲絕妙起視則無所覩矣公自是琴理益精河南亂後失琴所在

王祭酒

吾郡歷城明翰林王公敷字雲芝成化甲辰進士及第第三人諸生時讀書臥牛山寺夜見地有火光發之得石匣匣有書二冊讀之遂能御風出神知未來休咎生平異事甚多嘗與僧采枸杞山上僧先下扣門公已先在啓扇官河南四川督學試日諸生見鎖院牕廡各有一公危坐一日見白雲一片命騎追之雲落地化爲石色如雪煮食之其甘如飴曰此

雲母也行輝縣山中忽下輿拜曰丈乃在此令掘地得奇石置之百泉書院又於道左古垣中開視得紫石硯二枚各有鴛鴦一隻雌雄相向嘗云地如竹篩眼凡有異寶皆可見又采杞僧臨終公問所欲言曰欲富貴兼之公曰但堪作一藩王耳朱書其背曰蜀王比王生第二子背上隱隱有書字尹恭簡旻寢疾問之曰有大鶴入室飛旋已而颺去公之神也果然官終南國子祭酒預知死期但化時四城門皆見公羽衣鶴氅而去如雲水道人鄉人於良鄉道中遇鼓吹從南來視之乃公也王陽明素推服之張尚書鶴鳴爲作傳先贈司徒公生時大父方伯贈司徒公取公名名之

民母鼻千

民母嫡母也見漢服虔注又王伯厚漢制考云始生子爲鼻
子

倉頡

倉頡祠墓在壽光縣城西門瀕河劉文和公明縣人也幼時
讀書外塾每往返涉水輒有白鬚老人負之久之問何人答
曰我倉頡所遣送迎公者他日富貴毋相忘公既貴後謁倉
頡祠有侍者形容宛如所見遂新其祠墓云

靖州鷄鵝

靖州觀音寺與副將某署相鄰一日廚人宰鷄鵝忽飛上寺
殿鷄尾僧異之因乞施寺中每朝夕課誦鵝輒上殿諦聽日
食蔬飲水而已自順治中至今二十餘年尚在又明字寺有

一鷄亦在佛前晨夕聽經如是四十年化去一夕見夢老僧
曰弟子已往生武岡王府三年後師可來一相視僧異其言
及期往武岡郡王生子適三歲矣不能言見老僧至忽問訊
曰別師三載無恙乎僧歸紀其事於石有吳君者從軍湖南
至寺親見之蠢動俱含佛性信然

趙解元

趙浮山舟登州大嵩衛人順治甲午領解乙未公車入京師
居汾陽館館中廳事有武安王神像趙居其側偶狎一妓其
父趙翁曾官通判里居放榜之夕忽夢入一大城有偉丈夫
自委巷出揖翁問曰君非趙某耶曰是也曰吾潘姓關帝下
直日功曹也爾子本應今科高第入翰林以近日得罪神明

奏聞上帝且降罰矣頃之鼓樂騶從駢闐而至有神人戕冠
盛服手黃紙功曹亟指示曰旨下矣可俯伏聽之翁如言竊
視紙上則大書趙作舟三字以硃筆勒之功曹曰君可去矣
郎君罪止罰科耳作舟既下第歸入門翁詰其故且具述夢
中所見作舟悚然後踰登公車者二十四年署東平州學正
康熙己未始登第改翰林院庶吉士親述其事如此

異馬異牛

癸亥在京師見一馬索值千二百金通身毛如新鵝兒黃無
一莖異惟尾鬣獨黑又一馬索值五百金通身如雪上作桃
花文紅鮮可愛又額駙石公家一紫花特牛文如海棠色施
銜勒走及奔馬云得之南中

波斯犬

嘗於慈仁寺市見一波斯犬高不盈尺毛質如紫貂聳耳尖
喙短脛以哆囉尼覆其背云通曉百戲索價至五十金亦宋
太宗桃花犬之屬也

梅異

宣城自本朝來科甲久不振康熙己未施侍講愚山問高
檢討阮懷詠以辟薦孫編修予立卓茆編修楚畹薦以鼎甲
四人同時入翰林時施園有梅三月復開四花其方位恰應
四人所居人以爲異梅孝廉澗公清繪爲圖壬戌阮吉士爾
亦入翰林或謂宣城有文昌閣久頽廢甫新之五君遂相次

入翰林云

壬戌甫卒癸亥施孫相繼卒
乙丑高卒又不知何說也

籤驗

京師前門關帝廟籤夙稱奇驗予順治己亥謁選往祈初得籤云今君庚甲未亨通且向江頭作釣翁玉兔重生應發跡萬人頭上逞英雄又云玉兔重生當得意恰如枯木再逢春爾時殊不解是年十月得揚州推官以明年庚子春之任在廣陵五年以甲辰十月內遷禮部郎所謂庚甲者蓋合始終而言之揚郡瀕江故曰江頭也然終未悟後二句所指至庚申年八月置閏而予以崇禎甲戌生實在閏八月過閏中秋四閱月遂蒙 聖恩擢拜國子祭酒於是乃悟玉兔重生之義諺云飲啄皆前定詎不信夫

名龜

麟鳳龜龍竝稱四靈漢唐宋已來取龜字命名者不可勝紀至明遂以爲諱殊不可解惟張太嶽生時其母夢一大龜入室因名之曰龜後夢神人謂洩天機乃易名

蜘蛛塔

京師城西慈慧寺有蜘蛛塔萬曆中少詹南充黃公平倩輝書碑平倩耽禪悅與僧愚菴善嘗住此寺一日方誦金剛經次一蜘蛛緣案上向佛而俯驅之復來黃曰爾以聽經來耶爲誦終卷又爲說情想因緣竟蜘蛛立蛻化去因以桑門法起塔復書碑記其事云

義蜂冢

金山有義蜂冢鎮江府廨有蜂一筒逸出其王斃羣蜂相揉

藉爭死之不下萬餘嘉靖中鎮江嚴同知者爲立義蜂冢徐
尚書養齋問作蜂冢歌紀事云羣蜂勢方屯主峰自殘折意
氣許與成君臣義心欲奮秋陽烈摧軀抉股同死君田橫門
客多如雲後人重死不重義奉頭鼠竄何紛紛微蟲感恩乃
至爾吁嗟萬靈不如此金山山高江水寒孤冢蒼茫爲誰起
西園雜記云嚴名應階綠雪堂雜言云在北固山楊遠菴閣
老表爲義蜂冢

○萬孔

明成化中萬安爲相與萬貴妃通族爲古今笑柄然陳後主
時都官尚書孔範與孔貴嬪結爲兄妹已前此矣乃知奸邪
行事亦有所本

謝鳳

宋謝鳳康樂之子超宗父也元嘉中爲鄞令今奉化縣屢著靈異
縣人祠之元大德十二年饑有巨艘自南劔運米至鮎亭聞
有人招之者曰吾謝鳳也人賴以活至正中寧海賊犯境官
軍逆戰仰見大旗飛揚萬騎雲合旗有謝字賊駭而奔斬獲
無數貝瓊清江集有謝公廟記

懿徽二宗事相類

學圃薰蘇載唐懿宗於苑中取石造山崎危詰屈有若天成
又命取終南草木植之山禽野獸縱其往復造屋室如庶民
家未及半年奇花異草自然生滿宮殿識者以爲丘墟之象
與宋徽宗長徽事絕相類

水晶

門人南陽李鴻嘗贈予印章色類梅檀質如玉上作龜紐甚精云是水晶海外產也

宋諸相八字

宋人小說載蔡京八字丁亥壬寅壬辰辛亥與東京鄭粉兒子干支盡同猗覺寮雜記韓莊敏與吳冲卿王禹玉同詣天祿山人卦肆莊敏先云己未七月初九日寅時生禹玉午時生天祿皆云極貴後俱宰相能改齋漫錄載會布八字乙亥丁亥辛亥己亥與章惇同乙亥生章戲呼曾爲四亥公又蕭注八字癸丑乙丑乙丑丁丑王安石以辛酉十一月十二日辰時生韓絳以辰年辰月辰日辰時生布以大觀元年八月

二日卒其弟肇以三日卒先後才一日京與祖某父準皆以七月二十一日卒三世同忌日見老學菴筆記

何中官

勺中志略載弘治時中官何文鼎以壽寧侯事忤孝宗死後於宮中常憂銅缸爲厲按西園雜鈔云孝皇始甚怒旣聞文鼎言然之止責置南京閑住鄭端簡公吾學編餘云文鼎素忠直二張褻視御帷文鼎持大瓜箠之幾死泰陵竟不罪文鼎三說皆不同然死而爲厲之說非實錄

相國孫

雲間某相國之孫某乞米於人歸途無力自負覓一市傭代之曠其行遲曰吾生相門不能肩負固也汝傭也胡爲亦爾

對曰吾亦某尚書孫也此聞諸董蒼水俞孝廉者貴人子孫不可不知

宋三賢八字

富文忠公以甲辰正月二十日巳時生蘇子容以庚申二月二十二日巳時生王正仲以癸亥正月十一日申時生李公擇孫莘老相善公擇卒以元祐五年二月二日莘老以三日先後才一日俱見吳曾漫錄

左手把筆

棗強宋中郎師康熙丁未進士工諸體書後知獲嘉縣忽遭風疾遂以左手把筆其工不減於舊老學菴筆記載陸元長宗室不微梁子輔皆用左手作字勝於右手又趙廣以左手

畫觀音大士信有之矣

故藩址

濟南德藩故宮面南山負百花洲宮中泉眼以數十計皆登泓見底石子如擣菹然青州衡藩故宮亂後尚存望春樓及流觴曲池上有偃蓋松蓋數百年古物予順治丙申飲於此甘橘繡毬尚數十株後丙午丁未間周中丞有德另建撫署乃卽德藩廢宮故址移衡藩木石以構之落成壯麗甚衡藩廢宮鞠爲茂草矣放翁記長安民家契券四至有云某處至花萼樓某處至含元殿者古今皆然

山無僧寺

陸放翁云天下名山惟華山青城茅山無僧寺吾鄉勞山亦

無僧寺明萬曆間憨山大師建海印寺於勞山尋爲道流所
訟譴戍粵東

米太僕研

米紫來翰林漢說其大父太僕公萬鍾知六合縣口蓄一古研
甚寶惜一日渡江沉於水急懸重賞募善泅者下取之百計
不能得但惋惜而已次早將解纜忽有紅霞起水面其光燭
天公曰必吾研也命舟人於其下索之研果隨手出公大喜
賞之如格

煞風景

予在江南時目擊煞風景者四事一金陵桃葉渡順治初一
縣令邵姓者建橋其上榜曰利濟一青溪長板橋明末爲葛
禮部寅亮所毀一焦山焦先祠像設作冕旒如王者旁設儀
仗一金山築城壘有鎮江孔知府者曲阜聖裔也於諸門朱
書乾坎艮震等字山有裴頭陀藏金洞孔改題曰開山第一
洞每舉似人皆爲捧腹

白帽子

張影繡庶常光南宮人康熙戊午赴順天鄉試時其父病意
不欲往父強之再三乃行是夜宿旅舍夢有人送一白帽子
令著覺而惡之自是每夜必夢心悸欲歸而父書至言病良
已遂勉終場事歸塗夢亦如初抵家父已久愈而報人尋至
則張領解矣是夕遂不復夢明晨賀客麇至一客忽云邑中
自大司馬白公後久無冠冕者喜君繼之張始悅然而悟白

公諱圭前明正統某科解元累官兵部尚書

宮侍御

秦州宮侍御宗袞仁夢初名弘宗久困場屋欲更名一夕夢鄉前輩林會元東城春手書一冊予之林公字子仁於是更名夢仁是科已酉遂舉順天鄉試明年庚戌中會元癸丑殿試入翰林改御史

名字

子兄叔子士十餘歲時在家塾一日會食有舉焦大史姓名為問者或曰此無它亦如魏相字弱翁之類耳兄在末坐遙對曰非也此本考工記輪人竝其輻廣以為之弱舉坐驚歎以為夙慧

老子

唐追尊老子為玄元皇帝至宋政和中崇奉道教又詔陞老子於列傳之首別為一帙尊道德為大經御製註解令學者與易書等經分習之禁以耳聃伯陽命名其為兩代尊奉如此

論語識

論語識云孔子讀易韋編三絕鐵搗三折漆書三滅後世但知韋編一語下二語遂不著又王原叔云顏子讀書鐵鏹三摧風俗通古今注云趙高用事獻蒲為脯指鹿為馬鄭康成禮器注趙高欲作亂以青為黑黑為黃今人但知鹿馬一語高僧傳載支道林嘗養一鷹人或問之答曰當以神俊今人

但知其賞馬不知其賞鷹惟坡公有支遁鷹馬圖詩世說郭
林宗還鄉里送車千乘獨李膺與林宗共乘薄笨車上大槐
坂觀者望之若喬松之在霄漢然世止知同埒而不言同車

王延喆

明尚寶少卿王延喆文恪少子也其母張氏壽寧侯鶴齡之
妹昭聖皇后同產延喆少以椒房入宮中性豪侈一日有持
宋槩史記求粥者索價三百金延喆給其人曰姑畱此一月
後可來取直乃鳩集善工就宋版本摹刻甫一月而畢工其
人如期至索直故給之曰以原書還汝其人不辨真贋持去
旣而復來曰此亦宋槩而紙差不如吾書豈誤耶延喆大笑
告以故因取新雕木數十部散置堂上示之曰君意在獲三

百金耳今如數予君且爲君書幻千萬億化身矣其人大喜
過望今所傳有震澤王氏摹刻印卽此本也又有持琥珀求
售者中有蜘蛛形狀如生索直百金延喆謂蛛果生耶曰然
然則碎而視之果爾卽償百金否則一錢不直手碎之果有
生蛛自內躍出行几上數巡見風化爲水乃立以百金償之
其豪快如此

聖泉

貴陽城西南有聖泉有貴人至輒沸起驗之百不失一滇逆
將倡亂雲貴總督甘公文焜暨諸大吏一日遊泉上泉不沸
怪之未幾亂作甘死之又陸邾縣次說孫可望在黔中時有
僭逆之志至泉卜之水竟不至可望怒以礮擊之今泉上石

欄礮痕尚存

蘇文

宋時諺云蘇文熟啖羊肉殿帥姚某性饕餮每得坡公手帖輒換得羊肉數斤故坡有傳語本官今日斷屠之謹杜祁公爲相清儉非會客不食羊肉按宋時京官日支羊肉錢故云

廈門磚刻

明季崇禎庚辰歲有閩僧貫一者居鷺門即今廈門夜坐見籬外坡陀有光連三夕怪之因掘地得古磚背印兩圓花突起面刻古隸四行其文曰草鷄夜鳴長耳大尾千頭銜鼠拍水而起殺人如麻血成海水起年滅年六甲更始庚小熙皞太平千紀凡四十字閩縣陳衍盤生明末著槎上老舌一書備記

其語至今癸亥四十四年矣識者曰鷄酉字也加草頭大尾長耳鄭字也千頭甲字鼠子字也謂鄭芝龍以天啓甲子起海中爲羣盜也明年甲子距前甲子六十年矣庚小熙皞寓年號也前年萬正色克復金門廈門今年施琅克澎湖鄭克塽上表乞降臺灣悉平六十年海氛一朝盪滌此固國家靈長之福而天數已預定矣異哉

風聞

陳衍云風聞二字出漢書尉佗傳風聞老夫父母墓已壞削又晉書顧和對王導曰明公寧使網漏吞舟何忍採風聞以察察爲政

少正

陳衍云少正卯其人名卯而官少正也當時魯鄭皆有少正之官列於卿故子產亦稱少正按氏族博考云以官爲氏者有公正宗正少正正令等蓋卯官少正其後列國爲此官者子孫因以爲氏耳

郝氏遇仙

霸州郝恭定公惟訥母李太夫人戶部侍郎傑之配也孕公時家有盜警夫人倉卒墜樓傷股忽有老嫗詣門自言能療且曰腹中兒當大貴吾并活之先一手摩股久之投藥少許骨格格有聲遂相屬胎竟不墮醜以金帛辭弗受竟去不知所之後公中順治丁亥進士歷官左都御史工刑禮戶吏五部尚書

神黃豆

神黃豆產滇之南徼西南彝中形如槐角子視常豆稍巨用笮瓦火焙去其黑殼碾作細末白水下之可永除小兒痘毒服法以每月初二日十六日爲期半歲每服半粒一歲每服一粒一歲半每服一粒半遞加至三歲服三粒則終身不出痘矣或曰按二十四氣服之以二十四粒爲度雲南趙玉峯

麟中丞王子玠瑜刑部說

癸亥地震

康熙癸亥十月初五日山西巡撫穆爾賽疏報太原府屬地震凡十五州縣而代州崞縣繁峙爲甚崞縣城陷地中毀廬舍凡六萬餘間與丁未山東己未京師之災相似

族望

唐人好稱族望如王則太原鄭則滎陽李則隴西贊皇杜則京兆梁則安定張則河東清河崔則博陵之類雖傳誌之文亦然迄今考之竟不知爲何郡縣人殊可恨宋人罷官者多居近畿不歸其鄉死卽葬焉子孫亦遂占籍如鉅野晁氏東萊呂氏華陽范氏梓州蘇氏易簡代居京師又如歐陽居潁而葬新鄭蘇公居許而葬邾後世過廬陵睂州者豈復可尋其彷彿耶此二者至明乃無之

魚石

前卽墨令馬岷公斯盛說汧陽縣有魚石如饅頭狀破之卽成兩石各有一魚形鱗鬣宛然以手摩指之作魚腥云此山一

溪中所產石子盡然溪有魚石娘子廟求石者必禱之不禱則石皆無魚也前邾令陸雲士次雲又說新昌縣有水簾洞洞口出石亦如饅頭狀人戲云欲得糖者或肉或菜者破之一遍肖造物狡獪如此

叫蛇

西有叫蛇能呼人姓名應之卽死然性畏蜈蚣逆旅主人每以篋貯蜈蚣客至輒授之令置枕旁云夜半舍外有呼姓名者慎勿應但開篋縱蜈蚣蜈蚣卽徑去食蛇腦已仍還篋中

泰山孝子

順治十年四月泰安州知州某於泰山下行忽見片雲自山

巔下雲中一人端然而立初以爲仙及墜地則一童子也驚問之曰曲阜人孔姓方十歲母病私禱太山府君願殞身續母命母病尋愈私來捨身囑欲踐夙約不知何以至此知州大嗟異以乘輿載之送歸

蘇公墓

邳縣二蘇公墓明末劇寇吳宗聖作亂松柏剪伐無餘順治

初知縣張石只

篤行章丘人
丙戌進士

至謁墓下復爲封樹立碑增植

松樹千餘株題詩云峨眉遙望獨傷情樹盡碑殘野草生莫道荒村煙火絕山家今日是清明是夜夢一青衣曰東坡遣致謝問先生今何在曰在臨汝公至彼當相見是歲七月以事至汝州有青衣款門遺一卷乃東坡墨蹟蜀岡送蘇伯固

之巔南五言詩也青衣忽不見張異之因命工摹勒於石自記其本末如此

洞溪物產

陸次雲洞溪織志所載物產有絕奇者略記於此風鬼出黔中無形無影能以旋風攝人夜叉產蜀之黎州穴生長七尺亦名曰獮路見婦人盜之入穴生子以楊爲姓木客產粵洞中衣服舉止與人不異在恍惚有無間野婆亦產粵西狀如媼陟險如飛遇男子負去求合嘗有人刺其腰間得一玉印篆文莫能識黃丈鬼生東粵身著黃衣能爲疫癘潛牛居江中能上岸與牛鬪角軟入水濡之復鬪其力甚銳肉翅虎飛而下山食人食已復飛去月山叢談云夔州府有鬼物名小

神子高尺餘一二十為羣依人以居自景泰間始有之皆異聞也

成御史遇仙

前御史樂安成公寶慈勇明崇禎中以疏救黃公石齋道譴成鼎革後隱崑崙山中一日大雪登絕頂遙見松林中有人僵臥意其凍死趨而視之四面皆積雪無人跡其人衣木葉臥處丈許獨無雪見公至蹶然而起曰候公久矣問其年云不記年歲祇憶少在京師見楊椒山赴西市遂發憤出家學道耳向見左蘿石沈周泉二公託訊公起居故候於此問二公何在曰在上帝左右因又言二公每欲薦公自代沈公云成公正人顧嘗疑我今其疑須釋成公聞之惘然有間曰昔

沈公疏論漳浦遺書及我我不答此事人無知者誠不妄矣道人自言有長生術當授公公曰吾陳人也以速死為幸長生何為道人曰聊試公耳二年後清明日當偕二公候公言畢謝去步履如飛公果以康熙戊戌清明無疾而逝

響豆

同年李侍郎奉倩迴言樂安縣有孫公者年九十強健如四五十歲人自言生平惟服響豆每歲槐子將熟時輒令人守之不令鳥雀啄落既成實即收作二枕夜聽其有聲者即響豆也因棄其餘如是數易而得響豆所在每樹不過一枚每歲服不過一粒如是者數十年矣無他術也



沈氏

62

